

EKALESIA FAAPOTOPOTOGA KERISIANO I AMERIKA SAMOA
OFISA O A'OA'OGA KERISIANO



VASEGA MATUTUA FAAPITOA



AUKUSO - TESEMA

2019

FA'ASOLOGA MATAUPU VASEGA MATUTUA FA'APITOA 2019

1.	AOKUSO 11, 2019	LEILOA MA TOE MAUA
2.	AOKUSO 18, 2019	O LE OPOGI A LE TAMĀ
3.	AOKUSO 25, 2019	E FAUSIAINA AE LE TALEPEINA
4.	SETEMA 01, 2019	O LE TALA LELEI MO TAGATA UMA (<i>TALALELEI</i>)
5.	SETEMA 08, 2019	FAUSIAINA E LE POTO
6.	SETEMA 15, 2019	UA VALAAU IESU I Ē FIA INU
7	SETEMA 22, 2019	LA'ASIA LE LOLOTO

MALOLOGA O LE LOTU TAMAITI (SETEMA 29-OKETOPA 20)

8.	OKETOPA 27, 2019	IA PEPESE LE LALOLAGI UMA
9.	NOVEMA 03, 2019	LAVEAIINA I LE AMIOTONU
10.	NOVEMA 10, 2019	O LE VAVEGA I LE TAELEGA I PETESA
11.	NOVEMA 17, 2019	MAFUTA MA FA'ASOA
12	NOVEMA 24, 2019	IA AVEA MA TA'ITA'I LELEI (<i>ASO FA'AFETAI</i>)
13.	TESEMA 01, 2019	UA FETOI SETEFANO I MA'A
14.	TESEMA 08, 2019	AVATU MEAALOFA SILI MO LE ALI'I

Aukuso 11, 2019

Matāupu 1: “Leiloa ma toe maua.” (Lost and Found)

Tusi Faitau: Luka 15: 1-10

Sini: A mae’a lenei mataupu, ia iloa ma malamalama le fanau, e saili mai pea le Atua ina ia maua i tatou i lona alofa tunoa.

Fesoasoani mo le Faiaoga

O le tala i lenei taeao, o le fa’ataoto lea a Iesu i le mamoe na le iloa a ua saili le leoleo mamoe ina ia toe maua mai. O lo’o amata lenei mataupu i le lē fiafia o au faresaio ma le au tusiupu ina ua talia e Iesu tagata agasala e aai fa’atasi ma ia. I le talitonuga o tagata Iutaia, e matuā le talafeagai lea tulaga. O le manatu o le au faresaio ma le au tusiupu, o tagata agasala e tatau ona vavae ese mai i tagata ola uma. O lo’o soso’o ane ai ma le fa’ataoto i le mamoe na le iloa a ua saili lava le leoleo mamoe ia toe maua mai.

E lua ni mea tāua o lo’o fa’atatau i ai lenei fa’ataoto. Muamua, o le galuega fa’a leoleo mamoe. Ua iloa ma manino i le fa’ataoto o le leoleo mamoe lea, o le tagata alofa ma fa’amanoni i lana galuega. O le ata le na o le Atua alofa ma fa’amaoni i le tausiga o lana fanau. O le Atua e na te le tu’ulafoaina i tatou ia fano i faiga a le tiapolo. Lua, o le iai fa’atasi O Iesu ma tagata agasala, o le fa’aailoga o le Atua e le alofa fa’apito. Ua maliu mai o ia mo tagata uma ae maise o le fa’aolataga ina ia ola tagata uma.

E foliga mai i le fa’ataoto o le mamoe na le iloa e fa’atatau i le tagata ua le iloa ona o le agasala. O le iva sefulu ma le iva o i latou ia o lo’o lelei pea o latou ala. O lona uiga, e tatau i le leoleo mamoe ona saili le mamoe lea e tasi ina ia sao mai i le paū atu i le malaia. E foliga tutusa le fa’ataoto i le mamoe ma le tupena le iloa. O lo’o fa’amatalaina ai le olioli loloto o le tagata pe afai a toe maua mai.

A’OA’OGA

O le ata atoa lea o le finagalo alofa o le Atua mo i tatou. O tatou o isi ia leoleo mamoe a le Atua. O le tatou galuega, o le laveaiina lea o tagata ua le ailoloa, ona o faiga a le agasala. Peita’i, e tatau ona tatou muai lavea’i ia’i tatou lava ona mafai lea ona tatou lavea’i atu i nisi tagata. A tatou lavea’i ia’i tatou fa’apea ma nisi tagata, o le a olioli le Atua i le lagi ona o i tatou ma le galuega ua faia. Ae fa’apefea ona faia o lea galuega? O fea e aumai ai le malosī e mafai ai ona tatou faia o lea galuega? E le faigofie, ae o le tatalo i le Atua e mafai ai. O le tatalo e ō fa’atasi ma le fa’amaoni ma le alofa ma isi uiga lelei uma e olioli ai lo tatou Tamā oi le lagi. Ia avea i tatou o ni mamoe ma ni leoleo mamoe lelei e tatou te o atu ma saili mai ni mamoe ua leiloloa ona o le agasala. E sesē fo’i i tatou i nisi taimi, ae saili mai lava le Atua ina ia laveai’ina i tatou mai i le agasala. Ia manatua, o le ala lava lea na maliu ai Keriso, ina ia toe maua atu i tatou i aao alofa a lona Tamā.

GAUEGA FAATINO

1. Ia faaavanoa se lima minute e tusi mai e tamaiti se parakarafa e toe faamatala mai ai le tala sa faamatalaina ia latou lava upu.
2. Ia fatu se pese e faatatau I le mataupu.
3. Ia faamatala manino uiga o upu e le malamalama ai tamaiti.

IA MANUIA LE TAPENEGA MO LE ASO SA

Aukuso 18, 2019

Matāupu 2: “O le opogi a le Tamā.”(The fathers embrace)

Tusi Faitau: Luka 15: 11-31

Sini: A mae’a lenei mataupu, ia iloa ma malamalama le fanau, o le alofa moni fa’a tamā e maopopo ai aiga.

Fesoasoani mo le Faiagoa

O le tatou tala i lenei taeao, o le fa’ataoto a le Ali’i i le ui’i fa’amaumau oa e pei ona masani ai le to’atele. O le tala masani i le tamā ma ona atali’i e to’alua. (Ia faitau le tusi paia ma fa’amatala le tala i au lava upu.) O le fa’amamafa o lenei taeao e aga’i tonu i le Tamā ma lana matāfaioi i totonu o le tala. E le i faigofie i le tamā lana galuega sa fai. E fai o le alofa i le tama matua, ae le galo ai fo’i le alofa i le tama la’ititi. E tusa ma le fa’amatalaina o le tala, e leai lava se isi o nei tama e sa’o. O le manatu o le to’atele o ē faitau i lenei tala, e sili ona sesē le tama la’ititi auā sa ia fa’ama’imau le vaega oa tele a le aiga. I le tu ma le aganu’u fa’a Isaraelu, o le ulumatua lava e soso’o ane i matua i mea uma o le aiga, peita’i, o lea ua muamua ave i le ui’i. O lona uiga ua le sa’o ma lē talafeagai le fa’avae o aiga. Ou te manatu, e iai fo’i le mea e sesē ai le tama matua. Ina ne’i fa’apito le lagona i le sesē o le tama la’ititi, ae galo ai le fa’aletonu o le tama matua. E sesē le tama matua i lona lē fa’amagalo i lona uso la’ititi. O ia e matua, o lona leo fo’i e tupu ai le filemū i lo la vā. E tatau ona ia fa’amagalo i lona uso la’ititi.

O uiga nei o fanau sa le faigofie i le tamā peita’i, sa ia te ia le onosa’i ma le alofa moni fa’a tamā. Sa ia avatu lava ma le alofa fa’a tamā i le atali’i la’ititi, fa’atasi ai ma lona talitonu i lona atali’i matua o ia e tupu ai le leleiga i lo la vā, peita’i ua le tutusa ma le mea ua tupu.

O le tala a Luka fai mai “**ua iloa mamao atu o ia e lona tamā, ona mutimuti vale ai lea o lona alofa, ua momo’e atu o ia, ua fusi ia te ia, ma sogi atu ia te ia.(f-20).**” O le ata o le alofa moni fa’a tamā e onosa’i ma fa’atalitali. O le alofa e le fiu gofie, tusa lava po’o le a le leaga a le fanau.

Sa le gata ai i le tama la'ititi lona naunauta'i, ae na fa'apea fo'i i le tama matua. Ina ua fa'aali atu le lē fiafia o lona atali'i matua, sa fa'apea ana upu **“Ta e, ta te nonofo pea ma oe, o a'u mea uma fo'i o au ia.(f-31)”**E tapena mea uma o le aiga auā se manuia o le fanau i le lumana'i. E le faia ni mea lelei mo ia lava, ae faia ma le fa'amoemoe alofa ia manuia le fanau. Ua le faapito le alofa i se to'atasi a ua taumafai lava i se auala e opogi mai ai le fanau ma ia maua se maopoopoga lelei.

A'oa'oga

1. Aua le alofa faapito
2. Ia maua le loto faamagalalo ma le onosa'i
3. Ia maua le loto alofa I lou uso
4. Ia e ava I ou matua

GALUEGA FAATINO

1. Ia fatu se pese e talafeagai ma le mataupu
2. Ia tusi se solo e faatatau I le ulutala **“ LOTO FAAMAGALALO”**
3. Ia vaai le tusi faitau o le Aso Sa o muamua e ave I le fanau e latou te sailiili ai.

IA MANUIA LE TAPENAGA MO LE ASO SA

=====

Aukuso 25, 2019

Matāupu 3: “E fausiaina, ae le talepeina”. (Building up, not tearing down)

Tusi Faitau: Ieremia 24: 1-7

Sini: A mae'a lenei mataupu, ia iloa ma malamalama le fanau, e aogā mea e tutupu, e maua ai a'oa'oga e toe fausia ai se amataga fou.

Fesoasoani mo le Faiaoga

O le tala i lenei taeao e fa'atatau lea i le fetalaiga a le Ali'i i lona nu'u o Isaraelu e ala mai i lana perofeta o Ieremia. O le vaiatau o Ieremia e foliga tutusa ma le vaiatau o Isaia. O le vaiatau o le nofo pologa o Isaraelu i Papelonia. Pe a toe fa'amatalaina, o Isaraelu lea ua fa'atafeaina i Papelonia. O le talitonuga fa'a Feagaiga Tuai, o lea ua ave e le Atua lona nu'u se i a'oa'i ona o le tele o le agasala. O le ato mati lelei lea e pei o le tala fa'atusa o lo'o aumaia i le tusi faitau, o lo'o fa'atatau lea i le mea lelei o le a faia e le Atua i lona nu'u. O le nu'u sa alofa i ai le Atua ma le fa'amaoni. O le nu'u sa fuā ai le Atua pe a mulimuli atu i nu'u ese e tusa ma le mau a Hosea. O le nu'u sa maoa'e lona tamaoiga i le

valu seneturi, ma i'u ai ina galo le Atua. O lea lā ua fa'atafea i nu'u ese, ae le tu'ulafoaiina lava e le Atua. O le uiga lena o le ulutala e totoina ae le lia'iina e pei ona aumaia i le fuaiupu e lima. O le isi lea natura o le Atua, e a'oa'i ae le fai mea tu'ulafoa'i. E ui ina fa'asala lona nu'u, ae nate le tuuna ina ia fano e fa'avavau. O le nofo pologa i Papelonía, o inā na tōtōina ai e le Atua le a'oaiga mo lana fanau. O le fa'amoemoe mo se taeao fou. Ana le alofa le Atua, e tu'ufau lava lona nu'u e fai le agasala ma fano ai e fa'avavau. O le a'oaigaina ia salamo le tagata mai I le mea sese sa fai ma le faamoemoe e toe fo'I atu I le Atua. E le finagalo le Atua ia o'o le oti I lana fanau, ae le mafia fo'I ona ia faasa'oloto le tagata e fai le agasala. O lona uiga o le a'oaiga ina ia ola, ae le o le liaiina I le malaia. O le finagaloo le Atua ina ia totoina pea le mautinoa i loto o lana fanau o loo soifua pea o ia le Atua alofa.

A'oa'oga

Ua a'oa'o mai lenei mataupu i se feau tāua mo i tatou. O le olaga e tutupu pea mea fa'aletonu ma avea ma auala e fa'avaivaia ai i tatou. O le malosi o le tatalo ma fa'amaoni i le mafutaga ma le Atua e totoina ai mea lelei i o tatou loto, ae le o le liaiina. E tāua i lo'u loto le vaega mulimuli o le parakarafa o lo'o iai upu e fa'apea, e fai foi i latou mo'u nu'u, e fai fo'i a'u mo latou Atua; pe a latou toe fo'i mai ia te a'u ma o latou loto atoa. E mafai ona fausia pe totoina pe a fo'i i le Atua ma le loto atoa. A fa'amatala le loto atoa, o lona uiga ua iai mea lelei uma. Ia fausia le ola ina ia lelei ae le o le liaiina.

GALUEGA FAATINO

1. Ia fatu se pese e talafeagai ma le mataupu
2. Ia tusi se solo e fa'aogaina ai upu nei; "Fausiaina, ma Talepeina."
3. Lisi mai ni upu o lo'o i le tusi faitau e te le malamalama ai.
4. Ia vaai le tusi faitau o le Aso Sa o muamua e ave i le fanau e latou te sailiili ai.

IA MANUIA LE TAPENAGA MO LE ASO SA

=====

Setema 01, 2019

Matāupu 4: "O le tala lelei mo tagata uma." (Good news for all)

Tusi Faitau: Mareko 13: 3-13

Sini: A mae'a lenei mataupu, ia iloa ma malamalama le fanau, o le tala ia Iesu ua manuia ai tagata uma.

Fesoasoani mo le Faaiga

O le tatou vasega o le vasega matutua fa'apitoa. Ou te lagona foi e tataua ona malamalama lelei i le mataupu o lenei Aso Sa. O le tusi faitau o le valoaga lea a Iesu e fa'ataua i le fa'autia o le malumalu. Peita'i, o lea valoaga o lo'o afifi mai ai totonu se a'oaiga tele mo lona au so'o fa'aolioli mo le tala lelei. O le molimau a Mareko fai mai, o luga lava o le mauga o Olive e feagai

ma le malumalu, sa a'oa'o atu ai Iesu i ona so'o i nei mea o le a tutupu. O le mauga o Olive e i le itū i sisifo o Ierusalem, o lona ifo mai i lalo e fesaga'i tonu ma lea malumalu (Application Study Bible).”

Ua uma ona fetalai atu Iesu i ona so'o i le taimi e fa'aumatia ai le malumalu, ae toe fesili so'o o Iesu po'o afea e taunu'u ai ia mea (f-4). O le fesili a tagata fia malamalama, ae foliga mai o lo'o atagia mai ai ma le popole vale. E peiseai ona tagata ua fa'atu ina ne'i o'o mai ia aso. O le ala tonu lea na tali ai Iesu ma ia fetalai **“Pe a tou fa'alogi i taua ma tala o taua, aua tou te atuatuvaie (f-7)”**. O lea ua a'oa'o atu Iesu i le ola tapena ma ia malamalama i le gasologa o mea e tutupu. O le fuaiupu e iva e o'o atu i le fuaiupu e sefulu ma le tolu, o lea ua matuā ta'u manino atu e le Ali'i i ona so'o, e feagai lava i latou ma puapuaga e o'o mai fo'i mafatiaga o le galuega. O le fuaiupu e sefulu ma le tasi o lo'o matuā a'oa'o ai le Ali'i i ona so'o i le mea e tataua ona fai pe a o'o mai fa'afitauli o le galuega. O lo'o taoto lava le fa'amamafa i le manan o le Agaga e n ate ta'itaina le tagata o le Atua. O le tala lelei lea mo tagata uma, o lea ua a'oa'o mai Iesu ina ia aua ne'i fa'apopoleina auā o lo'o iai le Agaga o le Atua e galue mo lana fanau. O le uiga lea o lana upu **“auā e le o outou e fai atu ai, a o le Agaga Paia (f-11).”**E le popole le tagata talitonu i le Atua, auā e tu lava le Atua mo i latou.

A'oa'oga

O le tala lelei lea mo tatou uma. Ua a'oa'o atu Iesu i ona so'o, ia aua ne'i atuatuvaie pe o'o mai faigatā ma puapuaga, auā e iai lava le Agaga o le Atua e fesoasoani i e e faia lona finagalo. Ia tatou loto tetele ma fiafia nei, auā ua tatou maua le tala lelei e le tu'ulafoaina lava i tatou e lo tatou tamā o i le lagi. O a mea faigatā o le olaga e o'o mai, ia tatou fiafia o lo'o soifua le Atua e fa'amāmā avega ia i tatou. Peita'i, e le avega lea ma mea e tatou te lē fa'amaoni ai i lana silafaga. Afai ua alofa mai le Atua, e tataua fo'i ona tatou alolofa i le Atua.

GALUEGA FAATINO

1. Ia usu se pese e fa'atatau i le Aso Sa o le tala lelei. (Pese 247)
2. Ia t a'u i tamaiti e tusi mai se parakarafa se tasi e fa'atatau i le taunu'u mai o le tala lelei i Samoa, pe afai o manatua.
3. Ia vaai le tusi faitau o le Aso Sa o muamua e ave i le fanau e latou te sailiili ai.

IA MANUIA LE TAPENAGA MO LE ASO SA

=====

Setema 8, 2019

Matāupu 5:“Fausiaina i le Poto” (Built by Wisdom)

Tusi Faitau: Salamo 144: 9-15

Sini: A mae’a lenei mataupu, ia iloa ma malamalama le fanau, o le poto lelei e amata mai i le Atua lona fausiaina.

Fesoasoani mo le Faiaoga

O le tatou tala i lenei taeao e fa’atatau i le soifuaga e mo’omia ai le poto. E le fesiligia le aogā o le poto mai i le Atua. O le poto e tataua ona maua e le tagata ina ia lelei ona fa’agasolo mea uma o le olaga. O le mea sili ona tāua ia avea le poto ma auala e iloa ai e le tagata ona ava ma mata’u i le Atua o lē na faia i tatou. I le Salamo atoa o lo’o fa’aulutalaina “O le tatalo ina ia manuia”; peita’i, o le fuaiupu e iva se ia o’o i le sefulu ma le lima o lo’o fa’atatau iai le mataupu o lenei taeao.

O le vaeluaga tonu lea o le tusi lenei, o lo’o amata ai le fuaiupu e iva i le viiga o le Atua. O le tala masani lea mo Isaraelu, o le Kitara ma le napeli e vivii ai i le Atua. O le viiga e fa’amanatu ai le Atua alofa ma lona silisili ese. E ō fa’atasi lea viiga ma le talosaga i le Atua ia alofa mai i le tagata fa’atauva’a. O le fausia o le atamai e amata i le Atua e fa’ai’u fo’i i le Atua. O le ata fo’i lea o lo’o aumaia e le fai Salamo. E foliga mai i le amataga o le mataupu, o le tagata e masani ona tauina taua ma manumalō pea. O le tagata ua masani lona uiga o le poto sa tauina ai taua na fausia mai i le Atua, ma o le ala foi lea o le toe fo’i o le viiga i le Atua.

O le fuaiupue sefululua e o’o atu i le sefulu lima, o fa’a naunautaiga laia o le fai Salamo. O lea ua fa’amatalaina le fausiaina o le manuia i le poto mai i le Atua. Fai mai le fai Salamo, “**ia avea ou atali’i e pei o laau e totō, ua tupu tele a’o taulele’a i latou; o matou afafine ia pei o tulimanu ua togitogiina e pei o se maota (f-12).**” Ua fa’atonu mai le fai Salamo, ina ia poto le a’oa’oina o le fanau, ina ia manuia le lumana’i. Ia fausia ma le poto lo latou ola, a’o lea poto e afua mai i le Atua. Afai e maua lea poto ma manuia lo latou olaga, ona tutumu lea o ā latou fale saito. O le a maua fo’i le manuia e tele i lo latou ola. Ona toe fai mai lea o le fai Salamo, e manuia fo’i lona laueleele i ana manu ma ana fa’atoaga. Na fa’amuliga le feau o le fai Salamo i le fa’aamua i le nu’u e fai le Ali’i ma o latou Atua. O lona uiga, o le poto e fausia mai i le Atua ae le o se isi lava mea.

A’oa’oga

A mana’omia le poto i le olaga, o le Atua e amata mai ai lona fausiaina. O mea lelei uma o lenei olaga o le Atua lava le amataga ma le iuga. O so’o se fa’amoemoe lelei e fia fausiaina, o le mea mautinoa o le Atua lona amataga. O le a’oaoga lea o lenei tala, ae lelei fo’i pe a fa’aopopo iai nisi a’oaoga o lo’o silafia e lau susuga le faiaoga.

GALUEGA FAATINO

1. Ia fatu se pese e talafeagai ma le mataupu
2. Ia tusi se solo e faatatau ile ulutala lea, “**O le Poto**”
3. Ia vaai le tusi faitau o le Aso Sa o muamua e ave i le fanau e latou te sailiili ai.

IA MANUIA LE TAPENAGA MO LE ASO SA

Setema 15, 2019

Matāupu 6: “Ua valaau Iesu i ē fia inu.” (Jesus calls the thirsty)

Tusi Faitau: Ioane 7: 37-39

Sini: A mae’a lenei mataupu, ia iloa ma malamalama le fanau, o Iesu o le vai ola e malie ai le galala fa’a le Agaga.

Fesoasoani mo le Faiaoga

O le tatou mataupu i lenei taeao e fa’atatau lea i se talio fetalaiga tāua a le Alii. Ua tusia e Ioane o Iesu sa iai i le tausamaaga o le fale apitaga ma ia a’oa’o atu ai i lea lava nofoaga. O le toe aso o le tausamaaga lea sa ia fetalai atu ai i tagata e fa’atatau ia te ia o le vai. Fetalai le Ali’i “**afai e fia inu se tasi ina sau ia ia te a’u e inu ai.(f-39)**” O le vaega muamua le na o le fuaiupu e tolu sefulu iva. E le faigofie le fetalaiga a le Ali’i, auā e foliga ua oge vai le nu’u ma ua matelaina tagata i le fia inu. E pei e foliga mai lava i le fetalaiga a le Ali’i, ua na o Iesu lava e maua ai le suavai. Afai o lea, e sa’o la Iesu, peita’i, e le o le suavai masani lea tatou te feinu ai i aso uma ae o le agaga ua matūtū i le agasala.

E lua ni manatu tāua ua maua mai i le fetalaiga loloto a le Ali’i i tagata i leni mataupu. O le manatu muamua Galala Fa’aleagaga: O le aano moni lea o le fetalaiga a le Ali’i, e lē o le tino ua leai se vai, a o le agaga ua galala i le fia inu vai. O le vai o le fa’aaloga o le ola, o lona uiga o lea ua fetalai le Ali’i, o ia lava e maua ai le ola. O le vai o le Agaga lea o le Atua auā o lea e lei o’o Iesu i lona mamalu. Ua tupu le galala ona o le agasala na fai ma mea e matūtū ai le agaga. Lua: O le alofa fa’avavau. Ua tatou iloa ma mautinoa i le faitau pea i le Tusi Paia, o mea uma na faia e Iesu; na faia i lona alofa fa’avavau. O le alofa e le uma ae fa’avavau pe tumau e o’o i le oti. Pe ana le popole Iesu i lo tatou ola, e le mafai lava ona fa’apea mai o ia o le vai. Pe ana le manatu mai le Ali’i ia i tatou, e na te le ta’uina mai o le Agaga o lo tatou fesoasoani sili i taimi na afio ai o ia i le lagi. Ua ia a’oa’o mai i mea lelei ma mea sili ma le fa’amoemoe ia tatou maua le manuia auā o le finagalo lea o le Tamā oi le lagi. E leai se isi faasinomaga sili o le tagata ua na o le Atua lava. Ia malamalama i tatou uma i e upu Samoa “E ama i le lalolagi ae matau i le Atua.” O loa uiga, o le Atua lava lo tatou faasinomaga, o ia fo’i tatou te ola ai.

A’oa’oga

O lo tatou ola fa'aleagaga, o Iesu lava e malie ai lo tatou galala. Ia tatou iloa ma mautinoa ua faia e Iesu mea uma lava ona o lona alofa e fa'avavau lea i lo tatou ola. O le maliu ma le toetu o Iesu Keriso o le pine fa'amaui lea o ia o le "Vai Ola" ma lona alofa fa'avavau i le lalolagi. O le a'oaoga a lea fa'atasi ai ma nisi a'oaoga o lo'o silafia e lau susuga le faiaoga.

GALUEGA FAATINO

1. Ia fatu se pese e talafeagai ma le mataupu
2. Ia tofia ni tamaiti e latou te fa'atinoina le tala o leni taeao.
3. Ia vaai le tusi faitau o le Aso Sa o muamua e ave i le fanau e latou te sailiili ai.

IA MANUIA LE TAPENAGA MO LE ASO SA

=====

Setema 22, 2019

Matāupu 7: "La'asia le loloto." (Crossing the deep)

Tusi Faitau: Esoto 14: 10-31

Sini: A mae'a leni mataupu, ia iloa ma malamalama le fanau, o le Atua e mafai ai ona tatou la'asia mea faigatā o le olaga.

O le tala i leni taeao o le tala masani lava ia Mose, ma le laveaiina o le nu'u o le Atua mai isi mea faigatā sa feagai ma i latou. O le mataupu lea ua o'o iai, o le taimi tonu lea o le solaaga a Isaraelu ma tuua Aikupito. O lea fa'atoā uma ona feagai ma mala e sefulu le nu'u o Aikupito, ma ua tu'uina atu fo'i e Farao le nu'u o le Atua e o. E ui lava la ina tu'u atu e o, ae sa toe tuliloa lava e Farao ma ana fitafita le nu'u o le Atua. Ua malamalama le tala e pei ona silafia e le to'atele. O le vaega lea o le a fa'aogaina i leni taeao, o le sauna atu lea o Isaraelu e sopoia le sami ulaula.

E le i faigofie le mea na faia e le Atua. O lo'o taoto mai i itu e fa o le samiulaula le oti. Ua vaai atu le nu'u e le mafai ona tupu o se mea fa'apea āua e matuā loloto lava le sami. O lea fo'i ua vaai atu i tua, o Farao ma ana au lea ua toe tuliloa mai ia te i latou. Ua matuā fefefe le nu'u, ma ua fa'apea atu ia Mose "**Ona ua leai ea ni tu'ugamau i Aikupito, na e aumaia ai i matou ina ia oti i le vao? Se a le mea na e fai ai leni mea ia i matou, ina ua e aumai matou nai Aikupito? E le o le mea ea leni na matou fai atu ai ia te oe i Aikupito o lo'o fa'apea atu, ia e tu'u pea ia i matou ina ia matou auauna i Aikupito, a e leaga ona matou oti i le vao (f-11,12).**" O upu a tagata le mautonu ma fa'atuatua itiiti. E tigā lava ona vaai i mea tetele ma le mata'utia, ua faia e le Atua mo i latou, ae le mafai lava ona talitonu.

O le tala a le tusitala, ua vaeluaina e le Atua le Sami ma savavali ai Isaraelu. Na saofia lava le nu'u o le Atua, a ua fasiotia lava Aikupito, E tāua le upu a Mose ma Arona sa fai i le nu'u o le Atua. Fai mai i la'ua "**Aua tou te fefefe, a ia outou laulau tutū ma vaai atu i le olataga mai le**

Ali'i, o le a faia e ia mo outou i le aso nei, auā o Aikupito tout e vaai atu i ai i le aso nei, tou te iloa lava i latou e fa'avavau. O le a tau le Ali'i ma outou a e fa'alogologo outou (f-13,14)."O le fe'au lea o lo'o aumaia, e iai pea le Atua i e talitonu ma fa'atuatua ia te ia.

A'oa'oga

E tele ni a'oa'oga e maua mai i lenei tala masani. O nisi nei o mea tāua e fia fa'amamafa. E pei ona tofia o Mose ma Arona e ta'ita'i le nu'u o le Atua, e fa'apena fo'i i tatou. A tofia i ta'ua e ta'ita'iina se fa'amoemoe, ia maua le loto tele. Aua le fa'alagolago i le potu ma le malosi, ae fa'amoemoe i le Atua i mea uma. Ia mata'u i le Atua ma talitonu e mafaia e le Atua mea uma. Ia tatou iloa e leai se malosi e sili atu i le Atua. Aua ne'i o tatou pei o Farao, le ta'ita'i e fia tofotofo i le Atua. Ia to'aga e tatalo ma fa'amoemoe i le Atua i mea uma.

GALUEGA FAATINO

1. Ia fatu se pese e talafeagai ma le mataupu
2. Ia faitau le Tusi Paia ma tusi i lalo ni upu e le malamalama ai
3. Ia fa'aavanoa se lima minute e toe fa'amanatu ai tulafono a Mose o lo'o i le Esoto.
4. Ia vaai le tusi faitau o le Aso Sa o muamua e ave i le fanau e latou te sailiili ai.

IA MANUIA LE TAPENAGA MO LE ASO SA MA LE MALOLOGA O LE LOTU TAMAITI

=====
Oketopa 27, 2019

Matāupu 8: "Ia pepese le lalolagi uma." (All the earth sing)

Tusi Faitau: Salamo 100: 1-5

Sini: A mae'a lenei mataupu, ia iloa ma malamalama le fanau, e tatau i le lalolagi uma ona viia le Atua o lē na faia i tatou.

Fesoasoani mo Faiaoga

O le ulutala i lenei taeao e pei e foliga mai o se fa'atonuga. Fai mai e pepese le lalolagi uma. O lo'o fa'amatalaina e lenei Salamo le atoaga o lenei ulutala. Faimai le fuaiupu muamua, Ia alalaga i le Atua le lalolagi uma, Aisea e alalaga ai i le Atua? ma le fiafia le lalolagi uma? O lo'o fa'amatalaina i le fuaiupu e tolu le mafuaaga tāua ma moni e tatau ai ona alalaga i le Atua le lalolagi uma. Fai mai le fuaiupu e tolu "Ia outou iloa o le Alii o ia lava le Atua; o ia na faia i tatou, ua fai i tatou mona, o le nu'u i tatou, o le lafu mamoe ua ia fagaina." O lo'o manino ma malamalama le fa'amatalaina e le fai Salamo le mafuaaga e tatau ai ona pepese le lalolagi uma i le Ali'i. Afai o le Atua na faia i tatou, o lonauiga ua tatau lava ma onomea ona pepese ma vivi'i le

lalolagi uma i le Atua. O su'esuega a tage ata popoto o le lalolagi, latou te le'i maua lava po'o fea tonu le pogai o le tagata. Ua na o ni su'esuega, e leai ni fa'amaumauga maumaututū pe sa'o fo'i. Peita'i, o le mau a le Tusi Paia fai mai, na faia e le Atua le tagata i le amataga i le efuefu ma le eleele. Na mae'a ona faia o le tagata ona manava lea i ai e le Atua o le manava ola (Kenese 2:7). O le pine fa'amau o lea mea, a o'o ina oti le tagata; e toe fo'i lava lona tino i le palapala ma avea ma efuefu ma eleele. O lona uiga la e sa'o le fai Salamo; e matuā tatau ma onomea i so'o se tagata ola ona viia le suafa silisili ese o le Atua. E le fa'apito le valaau a le fai Salamo i tagata. O le valaau i mea uma o le foafoaga e tatau ona vivi'i i le Atua. E tofu lava mea o le foafoaga ma le gagana. E vivii lava fo'i mea ta'itasi i lana lava gagana. E leai se mea o le lalolagi e le vivii auā se mea na tupu mai i sana lava pule sa'oloto. O mea uma oi le lalolagi, o mea na faia e le Atua i lona potu ma lona malosi. O lona uiga, e tatau ona vivii le lalolagi ma mea uma o i ai i le Atua le foafoa sili.

O le fuaiupu e lima o lo'o fa'amatalaina ai le ituaiga Atua foafoa lea. Fai mai le fai Salamo, o le Atua e lelei. O lona uiga, o lana foafoa na faia i mea lelei ina ia lelei. E ui ina foafoa mai i le so'ona nunumi i le amataga, (Kenese 1:2), ae sa ia tu'u iai mea lelei. O le fa'amoemoe atoa o le Atua, ina ia lelei mea e ola ai lana fanau fa'apea mea uma o lana foafoaga. E le gata i le lelei, a'o le lalolagi e fa'avavau. E le iloa e se tagata po'o se isi lava mea po'o le ā, ae po'o afea fo'i le mutaaga o le lalolagi na ia faia. O le mata'utia ma le lelei lea o le Atua, e tatau ai i le lalolagi uma ona pepese ma viia o ia. A'o le ā le pese e tatau ona pepese ai le lalolagi? E leai se isi pese, ua na o le fa'afetai lava. O lona uiga o le mea tatau lava ona pepese le lalolagi uma i le Atua.

A'oa'oga

Ia toaga le tama ma le teine talavou e pese ma vivii i le Atua. Ia tatou vivi'i i le Atua auā o ia na faia i tatou. Ia o fa'atasi le pepese ma le amio lelei. Ia faia uiga lelei uma e viia ai le Atua. Afai ua alofa mai le Atua i le amataga e o'o mai nei lava, e tatau fo'i ona fa'apenā le tatou tali atu ia te ia. E le na ona pepese e viia ai le Atua, o lau amio lelei o le viiga sili lea ona leotele i luma o le Atua.

GALUEGA FAATINO

1. Ia fatu se pese e talafeagai ma le mataupu
2. Ia tusia se solo e faatatau i le ulutala "Pese"
3. Ia fa'aavanoa se lima minute e fai ai iā outou pesepesega
4. Ia vaai le tusi faitau o le Aso Sa o muamua e ave I le fanau e latou te sailiili ai.

IA MANUIA LE TAPENAGA MO LE ASO SA

Novema 03, 2019

Matāupu 9: "Laveaiina i le amiotonu." (Saved by Justice)

Tusi Faitau: Aмоса5: 14-24

Sini: A mae'a lenei mataupu, ia iloa ma malamalama le fanau, o le faia o le amiotonu e fia silasila iai le Ali'i.

Fesoasoani mo le Faiaoga

O le tusi o Amosa o se tasi lea tusi tāua o le Feagaiga Tuai. O Amosa o le perofeta a le Atua na vavalo i le valu seneturi. O le valu seneturi o se vaitau lelei lea mo Isaraelu i le itu i le tino. O le taimi o le tele o le tamāoaiga na fa'amanuiaina ai Isaraelu e le Atua. Ua tele le manuia o le nu'u, ae na avea ma auala e tupu ai le fa'aletonu i le olaga o tagata. Ua avea le tele o le tamāoaiga ua le iloa ai e tagata le Atua. E lē o le iloa ua fiu e su'e, ae ua tauaso o latou loto ma mafaufau ona o le sesē o le fa'amamafa. Ua fai mea sesē, ma ua fa'atuputupulaia ai le agasala. Ua vaai maualalo le mauoa i le tagata mativa, ma ua fai nisi tagata matitiva ma pologa. O lea agasala ua aofia ai ma le au ositaulaga po'o tagata fai lotu. A fai taulaga i le Atua, ua fa'atetele, ma le fa'amoemoe e malie ai le finagalo o le Atua; ae faia pea le agasala. O lona uiga, ua latou fa'alata le Atua i mea o le tino. O le ala le nā o le fai mai o Amosa, aua le toe saili i Peteli, Kilikala, ma Peresepa. O nofoaga ia sa tapua'i ai i le Atua a ua lē toe aogā, auā ua na o mea pepelo e fai ai. Na toe fai mai fo'i Amosa, ia saili i le na faia Kima ma Kisila. (f-8). O Kima ma Kisila o vaitau ia e tetele ai le tamāoaiga, ae ai fo'i ua le aogā.

O le parakarafa o lo'o fa'aogaina e amata mai i le sefulufā e o'o atu i le luasefulufa. O le fuaiupu e sefulu fa ma le sefulu lima o lo'o lapata'i ma ai Amosa i le mea e tatau ona fai e le tagata. E tatau ona saili i le Atua, ae inoino i le leaga. O se mea faigofie tele, e le fa'atauina i ni tupe po'o nisi oloa taugatā. Na ona pau o le mea e fai, o le fa'amaulalo o le loto, salamō, ma toe fo'i i le Atua ona manuia lea.

O le fuaiupu e sefulu ono e o'o atu i le luasefulu tolu, o lo'o fa'amatalaina ai le iuga o Isaraelu o le a o'o iai. O le feau lea a Amosa o lo'o tala'iina. O le malaia ua oo mai mo Isaraelu ma e le toe fo'i lava. Peita'i, o le fuaiupu e luasefulu fa o o'o ta'uina mai ai e Amosa le auala mulimuli mo le tagata e toe fa'aolaina ai. Fai mai le fuaiupu, “ **A ia tafe ifo le fa'amasinoga e pei o le vai, ma le amiotonu e pei o vai e tafe tetele lava. (f-24)**”. O le autū lea o le feau a le Perofeta. Ua manino ma malamalama, o le faia o le amiotonu i luma o le silafaga a le Atua, ua na o nap au lea o le auala e fa'aolaina ai le tagata. Manatua fo'i, o lea ua uma ona folafola le malaia e le toe fo'i. A'o le feau a Amosa, fai mai e liliu le to'asā o le Atua pe afai e lagona le salamō moni ma fa'atino le amiotonu.

A'oa'oga

O le faia o le amiotonu e laveaiina mai ai i tatou i le paū atu i le malaia. O le faia o le amiotonu, o le tatou alolofa moni fo'i lea i le Atua ma i tatou lava. O le faia fo'i o le amiotonu e laveaiina mai ai nisi tagata i mea sesē o lo'o tatou faia. Ia manatua, o a tatou mea leaga e faia e le na o i tatou e a'afia ai, ae o lo'o afaina ai ma nisi tagata. Ia toaga e tatalo i le Ali'i e fesoasoani mai ina mafai ona tatou tete'e le fili ma ia tatou faia pea le amiotonu.

GALUEGA FAATINO

1. Ia fatu se pese e talafeagai ma le mataupu
2. Ia tusi se parakarafa e fa'amatala mai ai uiga o upu nei, "**Salamō ma le amiotonu**"
3. Ia vaai le tusi faitau o le Aso Sa o muamua e ave I le fanau e latou te sailiili ai.

IA MANUIA LE TAPENAGA MO LE ASO SA

Novema 10, 2019

Matāupu 10: "O le vavega i le taelega i Petesa.(The miracle at the pool of Bethesda)

Tusi Faitau: Ioane 5: 1-9

Sini: A mae'a lenei mataupu, ia iloa ma malamalama le fanau, o le tagata onosa'i e na te maua le mea lelei.

Fesoasoani mo le Faiaga

O le tala i lenei taeao o le tala masani. O le tala i le vavega na faia e Iesu i le taelega i Petesa. E le toe tau fa'amatalaina le tala auā ua malamalama. Na pau o le mea e fia faia, o le talanoaina lea ma toe fa'amanatu vaega tāua mo i tatou i lenei taeao. E tele vavega na faia e Iesu, a'o se tasi lenei o vavega ofoofogia o lo'o fa'amauiina e Ioane.

O le vavega lenei na faia i Ierusalem, fai mai o le taelega lea e latalata i le faitotoa mamoe. (Sheep Gate). O Petesa le igoa o le taelega i la upu Eperu, ma e lima ona fa'apaologa. (five covered colonnades). O lona uiga o se taelega tele pe a fua i le mau a Ioane. O le taelega e le tasi se ma'i e fa'amalōlō ai. (Ia matuā fa'amanino i le fanau mea ua ta'ua i luga). E lua ni mea ofoofogia o lo'o fa'amatalaina i lea taelega. Muamua, fai mai e alu ifo le agelu e gaepu le vai. O le tāua o lea mea, e tatou te iloa ai le alofa o le Atua ua leva ona iai a o le'i auina mai Keriso. O lea lava sa ia auina mai ana agelu e fa'amalōlō ma fa'aola i lana fanau. O lona lua, fai mai e tolusefulu ma le valu tausaga o nonofo ai le tagata mai lea i tafatafa ane o le vai lea ma fa'atalitali se tagata e lava lona onosa'i ma fa'atalitali. O le tagata ua fia malōlō, ma ua naunauta'i i le fa'amalologa a le Ali'i. Ua le avea le umi ona fa'atali e fai ma auala e muta ai le fa'amoemoe.

O le vaega sili ona ofoofogia, o le fa'amalologa a le Ali'i. O le vavega e le i toe fa'atali ae na ia fetalai atu ma le gualofa, "**Inā tu ia i luga, ave ia lou moega, ma ia e savali (f-8).**" O le fetalai na malōlō ai le tagata ma'i, ae na fa'aalia ai le mana silisili ese o le Atua. O lea fo'i le fe'au tauave a Ioane i lona vaitau, ua ia fa'ailoa atu pea o Iesu Keriso lava lea o le alo o le Atua. O tagata uma e fa'atuatua ia te ia e maua le ola e fa'avavau.

A'oa'oga

Ia tatou pei o lea tagata ma'i, e lavātia ona onosa'i fa'atalitali i le fesoasoani mai o le Ali'i. Ia aogā mea tigā o le ola e tatou te molimauina ai le pa'i mai o le Agaga o le Ali'i. Ia tatou iloa nei, po'o le a le umi ma le loloto o tigā o le ola e le tu'ulafoa'iina i tatou e le Atua. Aua ne'i avea

fa'afitauli ma mea tigā o le ola e fai ma mea e muta ai le fa'amoemoe. E iai le taimi o le Atua mo tatou.

GALUEGA FAATINO

1. Ia fatu se pese e talafeagai ma le mataupu
2. Ia tofia ni tamaiti e latou te fa'atinoina le tala o lo'o fa'aogaina i le mataupu.
3. Ia vaai le tusi faitau o le Aso Sa o muamua e ave i le fanau e latou te sailiili ai

IA MANUIA LE TAPENAGA MO LE ASO SA

Novema 17, 2019

Matāupu 11: “Mafuta ma Fa’asoa (Fellowship and Share)

Tusi Faitau: Galuega2: 42-47

Sini: A mae’a lenei mataupu, ia iloa ma malamalama le fanau, e aogā le mafuta fa’atasi ma fa’asoa i mea lelei mo se lumana’i manuia.

Fesoasoani mo le Faiaoga

O le tusi o Galuega o lo’o fa’amatalaina ai galuega a so’o o Iesu sa faia ina ua afio Iesu i le lagi. Na afio Iesu i le lagi ae auina mai lona Agaga e tauto’aluina ma fai ma fesoasoani sili i le tagata. O lea lava fo’i le Agaga sa fai ma fesoasoani sili i so’o o Iesu i le tala’iina o le talalelei. O le tala ofoofogia fai mai sa mātuā tupu ma ola le talalelei, ma sa matuā televave lona salalau atu i le lalolagi. O le molimau a le tusi o Galuega fai mai pe tusa ma le toluafe tagata na liliu ma talitonu talu ona mae’a atu le Penetekoso. O lea fa’amoemoe na mafua ona o le malosi o le fesoasonai o le Agaga o le Atua.

O le galuega sa le i faia to’atasi e se tagata. E ui lava fo’i ina ta’imua Peteru, ae sa le i faia na o ia le galuega. Sa latou (So’o o Iesu) galulue fa’atasi ina ia faigofie ma māmā le avega. O lea fo’i le auala sa faia e Iesu i le taimi o galulue fa’atasi ma ona so’o. Sa tele taimi na mafuta ai na o i latou ma fa’asoa. O lea lava fo’i le fa’amoemoe ua fa’aauuina pea e ona so’o.

Ua fai lava lea uiga lelei ma fa’ata’ita’iga lelei ia i latou na papatisoina e Peteru ma le au Aposetolo. Fai mai sa latou mafuta fa’atasi, ma le tofitofiga o areto, ma talotaloga (f-42). Sa latou iai pea ma le loto gatasi i le malumalu i lea aso ma lea aso. Ua tofitofi fo’i areto i lea fale ma lea fale, ua latou aai a latou mea ai ma le loto fiafia ma le loto lelei (f-46). E tele uiga lelei e tupu mai i le ola mafuta fa’atasi ma fa’asoa. E le ola fa’apito ai le alofa, ae maua ai fo’i le fiafia ma le loto lelei. E maua ai le fesoasoani mo mafatiaga, ma lē tausoa to’atasi ai se avega. O le soifuaga lea e

tatau ona ai le tagata Kerisiano. E tatau ona fefa'asoa'i i meaalofo mai i le Atua. O aiga Isaraelu e latou te fefa'asoa'i mea uma ua latou maua ina ia latou manuia tutusa i mea ua foa'iina mai e le Atua. E fa'aosoosoina pea i tatou e taofiofi mea ua tatou maua, aemaise pe a tele le tamāoaiga ina ia o tatou fiafia ma fa'amalie o tatou mana'o. Peita'i, o le a le maua ai le meaalofo o le mafuta ma fa'asoa. O le avea ma aiga o le Atua, o la tatou matāfaioi o le fesoasoani atu i le isi ou uso ma le tuafafine i auala uma e mafai ai ona maua le manuia. E sili ona lelei o le aiga o le Atua pe a galulue fa'atasi tagata uma.

A'oa'oga

Aua tatou te manatu fa'apito na o i tatou lava. Ia fa'asoa atu lou tamāoaiga i e matitiva ma mo'omia. O le ola mafuta e sili ona lelei i lo'o le saisaitia to'atasi i manatu ma lagona. O loumafuta atu i nisi e fesoasoani tele lea i ou fa'afitauli e ala i le fa'asoa. O le tutū fa'atasi e mafai ai ona mautū se fa'amoemoe.

GALUEGA FAATINO

1. Ia fatu se pese e talafeagai ma le mataupu
2. Ia fai i tamaiti e tali mai le fesili lenei i ni fuaiupu se tolu pe sili atu fo'i, Aiseā e tāua ai le mafuta ma fa'asoa?
3. Ia vaai le tusi faitau o le Aso Sa o muamua e ave i le fanau e latou te sailiili ai.

IA MANUIA LE TAPENAGA MO LE ASO SA

=====
Novema 24, 2019

Matāupu14: “Ia avea ma ta'ita'i lelei. (Be a good leader.)

Tusi Faitau: Mataio 23: 1-12

Sini: Ia mae'a lenei mataupu, ua iloa ma malamalama le fanau, o se ta'ita'i lelei e manuia ai tagata.

Fesoasoani mo le Faiaoga

O le tatou mataupu i lenei taeao, o lea ua lapata'i atu Iesu i ona so'o i nisi o mea lelei e tatau ona fai. Ua le muimui Iesu pe lafi fo'i mai i le au faresaio ma le au tusi upu. O lea lava ua ia talanoa manino atu lava i luma o le mtou o tagata ma ona so'o. Ua ia fa'asoa atu i le fa'afitauli o lo'o feagai nei ma ta'ita'i o le lotu. Ua fa'amalamalama e Iesu le olaga leaga lea e ole ai tusingu ma faresaio. Ua ia fetalai atu e faapea “**Ua ti'eti'e le au tusingu ma le au faresaio i le nofoa o Mose; o lea ia outou auauna ai ma outou faia mea uma latou te fai atu ai ia te outou e anaana i ai; ae aua tou te fa'aa'oa'o i a latou amio; auā ua latou fai atu, ae latou te le faia (f-2,3).**” O lo'o manino ma malamalama nei fuaiupu i le uiga moni o le mea o lo'o taumafai atu ai le Ali'i. Ia Iesu lava ia, o a'oa'oga uma o le tulafono o lo'o a'oa'o e tusingu ma faresaio e le afaina lea. E tatau

ona fa'alogo iai tagata auā o mea lelei. O a'oa'oga lava nei a tusia e Mose le Perofeta a le Atua, e tatau fo'i ona fa'alogo iai tagata. Peita'i, ua silafia e Iesu le mea lea o lo'o tupu. E a'oa'o atu ta'ita'i o le lotu i tagata, ae ese lava le olaga o lo'o ola ai.

(F 4-7) “Auā ua latou saisai avega mamafa ma le tagata, ma latou fa'ae'e avega mamafa i ua o tagata, ae latou te le mafafai ina fa'agaoioi ai i so latou tamatama'i lima. Ua latou fiafia fo'i i le mea sili e taoto ai i faigaai, ma nofoa sili i Sunako, ma ia alofaina i latou i malae, ia ta'ua fo'i i latou e tagata, Rapi e.”

O ni ta'ita'i le alolofa ma le lē fa'amaoni pe a fua i fetalaiga a le Ali'i. E fa'apefea la ona ola ni tagata ia latou ta'ita'iga? E lafo avega mamafa ae le galulue. E manana'o i viiga mai i tagata i ni auala le manuia. Ua fai mea uma i le vaaiga a tagata, ae leai se alofa. Ua le o fa'atasi a'oa'oga ma galuega. O le mea lea na ia a'oa'o atu ai i tagata, ina ia aua ne'i o latou fa'apenā; auā ua ia silafia o le mea sili e tupu mai i lou auauna atu i le Atua ma nisi tagata. O le ta'ita'i lelei e ia te ia le fa'amaoni ma le alofa. E va'ava'ai uma tagata ia te ia e aumai ai fa'ata'ita'iga lelei. E galue fo'i o ia mo le manuia o nisi tagata ae le na o ia lava. O le ta'ita'i lelei e galue ma faatino, ma ia faamoemoe i le Atua ae le o togafiti leaga.

O le vaiaso lenei e fa'amanatuina ai le aso fa'afetai e le atunu'u ma nisi atunuu o le lalolagi. O le vaitau e mafaufau ai ma le agaga faafetai i le Atua, i lona alofa ma lona agalelei i le lalolagi i taimi uma. Ia avea fo'i lenei taeao e fai ma taeao e tatou te fa'afetai ai i le Atua; ona o nisi o ta'ita'i lelei sa latou faia ma le alofa le tele o galuega lelei ua manuia ai nisi tagata ma talaiina ai pea le alofa tunoa o le Atua.

A'oa'oga

E le tumau pea le tagata i le la'ititi, e sau taimi e avea ai ma ta'ita'i pe a matutua. A o'o mai ia taimi, Ia avea outou ma ta'ita'i lelei. O ni ta'ita'i e alolofa ma fa'amaoni i folafolaga. Ia e amanatua, e sili lou auauna atu i lo'o le auauna mai o nisi ia te oe. Ia fai oe ma fa'ata'itaiga lelei i tagata. Aua e te saili viiga, a ia maua se viiga o le Atua i lau auaunaga. Ia e faamoemoe I le Atua i sau ta'ita'iga, ae aua e te falagolagoi lou potu ma lu malosi. Ia aua ne i avea lou tulaga ta'ita'i e te pule sau ai i tagata, a ia e lagooni le alofa m i le Atua. Ia faamanuia le Atua pe afai o le a o'o atu lo outou malosi I lea tulaga.

GALUEGA FAATINO

1. Ia fatu se pese e faatatau i le mataupu
2. Ia tusi se solo i le ulutala “O LE TA'ITA'I LELEI”
3. Ia lisi main i upu e te le malamalama ai i le mataupu
4. Ia faamanatu i tamaiti le mataupu o le Aso Sa o lumana'i

IA MANUIA LE TAPENAGA MO LE ASO SA

=====

GALUEGA FAATINO

1. Ia fatu se pese e talafeagai ma le mataupu
2. Ia faia se fa'atinoga pu'upu'u e fa'atatau i le fetogiina o Setefano i ma'a.
3. Ia vaai le tusi faitau o le Aso Sa o muamua e ave i le fanau e latou te sailiili ai.

IA MANUIA LE TAPENAGA MO LE ASO SA

Tesema 08, 2019

Mataupu 15: “Avatu mea alofa sili mo le Ali’i” (Give great things to the Lord) Kerisimasi

Tusi Faitau: Mataio 2: 1-12

Sini: Ia mae’a lenei mataupu ua iloa ma malamalama tamaiti, e tataua ona fai se mea alofa sili mo Iesu le pepe o le Kerisimasi.

Fesoasoani mo le Faiaoga

Ua tatou iai i le vaitauo le Kerisimasi. Ou te lagona ua malamalama uma i tatou i le tāua o lenei vaitau. O le tala la i lenei taeao, o le tala i le au makoi na o e saili po’o fea o fanau ai le pepe o le kerisimasi. O Mataio o le fai evagelia lea e sili ona tele ma mautū ana fa’amaumauga i le fanau mai o le pepe o le kerisimasi. Na amata lava le tala a Mataio i le fa’amatalaina o le gafa o Iesu. Na mae’a le fa’amatalaina o le gafa, soso’o ane ai ma le tala atoa i le fanau mai o Iesu. I le fa’amatalaina o le tala i le fanau mai o le pepe o le kerisimasi, o lo’o iai i totonu ma makoi ma a latou meaalofo sili na avatu ma le fa’aola. I le tala a Mataio, o mea alofa na o atu ma makoi o mea sili ia ona tāua ma taugatā sa iai latou, a’o lea ua avatu mo le Ali’i. O le auro, pululipano, ma le pulumuro; o oloa tāua ia ma le taugatā sa fai mea alofa ai makoi ia Iesu. Pe aisea lava ua ma’imau ai nei oloa taugata i le tama na fanau i le fale o manu? O makoi e iai le talitonuga o le su’esu’e o le Tusi Paia o nei tagata o Isaraelu moni lava. O tagata ua talitonu ma le fa’amaoni i le galuega mana a le Atua. Ai o le ala lea o le avatu o mea sili auā ua malamalama lelei i le uiga o le pepe lea o le Kerisimasi. E ui lava ina fa’atauva’a le auala o lona fanau mai, ae ua malamalama lelei tagata i lona tāua i le lalolagi. O le ala lea o le avatu o mea sili ma le lē masalosalo. E tāua le meaalofo ae sili ona tāua le agaga na fai ai. E tele ni mea lelei ua faia e makoi. Ua le gata ina latou laveaiina Iesu mai i le pule sāua a Herota a’o lea fo’i ua latou avatu mea sili mo le Ali’i.

A’oa’oga

O le agaga tonu lea o lenei vaitau e le gata ina fa’aalia ai le agaga o le fai mea alofa a ua fa’aalia ai fo’i le agaga o le fai mea sili mo le Atua fa’apea ma tagata. Mo lenei kerisimasi, ia tatou mafaufau loloto po’o le a se mea alofa sili o le a tatou avatu mo isi fa’atasi ai ma le Atua. O la’u mea alofa sili o le tatou ola alolofa, fa’amaoni, usita’i, fa’amagalo, loto maulalo ma isi uiga lelei

uma e tatou te fai mea alofa ai mo le Atua ma lona finagalo. O mea alofa nei e le fa'atauina i ni tupe, ae sili atu lo latou taugatā ma le tāua. O mea alofa nei tatou tea vatu ona ua tatou iloa o le Atua e na te fa'amanuia mai iai tatou i aso uma o lo tatou ola. O Iesu le pepe o le kerisimasi, o le mea alofa silisili lea na auina mai e le Atua ina ia ola le lalolagi uma. E leai se isi mea alofa e sili atu i le mea alofa ua tu'uina mai e le Atua mo le lalolagi. Ia manuia le kerisimasi.

GALUEGA FAATINO

1. Ia fatu se pese e talafeagai ma le mataupu
2. Ia tusi se solo e faatatau i le ulutala "O LE KERISIMASI"
3. Ia fa'aavanoa se lima minute e fai ai ni a outou pesepesega e fa'atatau i le Kerisimasi.
4. Ia vaai le tusi faitau o le Aso Sa o muamua e ave I le fanau e latou te sailiili ai.

IA MANUIA LE TAPENAGA MO LE ASO SA!

IA MANUIA GALUEGA O LENEI TAUSAGA!!



Tautua Printing Press
Congregational Christian Church of American Samoa
1 Kanana Fou Street, Box 1537
Pago Pago, American Samoa 96799
www.efkasonline.org